

Minister Oduber a reuni cu e protagonistanan

Proyecto Bubali Plas Conservation/Tera Park tin cu yuda conserva e plas

ORANJESTAD - Minister Otmar Oduber diahuebs mainta a reuni cu dos fundacion, Tera Aruba Foundation y Aruba Birdlife Conservation, cu a presenta un plan di iniciativa pa conserva Bubali Plas. Motibo principal di e bishita tabata pa solicita Minister Oduber su sosten y apoyo pa cu realisacion di e proyecto aki.

Minister a indica durante e presentacion di ta al tanto di

e situacion actual di Bubali Plas Saliña y cu e tin un perspectiva positivo riba e idea pa conserva Bubali Plas, como tambe su flora y fauna.

E PROYECTO MES

E proyecto Bubali Plas Conservation/ Tera Park ta inclui componentenan atractivo pa Aruba.

E parke lo conta cu un Bird Sanctuary, un Hardin Botanico, un Restaurant-Ecologico como tambe un area Educativo y pa Arte Recreativo. Naturalmente tur esaki sin perde e

esencia di su meta principal cu ta pa conserva Bubali Plas.

Ademas di esaki, manera a wordo indica pa ambos fundacion ta cu durante e trayecto di realisacion, bishitantenan por haci uzo di Tera Park.

Hopi importante ta pa bisa cu Bubali Plas Conservation ta forma parti di Parke Nacional Arikok, unda cu esaki lo forma un punto di union pa duna informacion pa cu e otro proyecto nan cu ta cay bou di Parke Nacional Arikok mirando cu tin mas plannan na caminda.



Bista di e reunion cu a tuma lugar riba e proyecto di conservacion di Bubali Plas

INICIATIVA FUNDACION

Minister Oduber a menciona di ta contento cu e iniciativa di e fundacionnan y cu e lo hiba e proyecto aki ora di reuni cu su coleganan minister pa nan apoyo y sosten.

Mas cu claro e interes di Minister Otmar Oduber ta centraliza mas den kico e proyecto aki lo significa pa nos desaroyo turistico.

E pioneronan a splica cu Bubali Plas Conservation/ Tera Park lo trece un otro clase di turista cu ne. Uno cu ta

fascina pa e hobby di birding, cu ta conoci pa ta un hobby caro.

Dor di e aspecto aki nos lo ta mas yamativo pa e grupo di turistanan aki cu ta conoci pa tin un fuente di entrada mas halto, como tambe nan ta e tipo di bishitante cu lo cuida nos medio ambiente.

Igualmente e proyecto aki lo por crea cupo di trabou pa esnan cu ta den e veldwerk pa desaroya nan conocimiento riba nos flora y fauna como tambe y specialmente nos parhanan. □